


丹陽縣志

ル 5  
3284  
15



門九5  
3284  
卷15

丹陽縣志卷三十四

藝文

古樂府

丁督護歌

李白

雲陽上征去兩岸饒商賈吳牛喘月時拖船一何苦水  
濁不可飲壺漿半成土一唱督護歌心摧淚如雨萬人  
鑿盤石無由達江滸君看石芒碭掩淚悲千古

梁父吟

陳輔

輔之少時每至沈山寺輒經年不去有梁父吟  
牛角歌悲昔遊諸樂府

昭和十八年  
八月十八日  
購

梁父吟梁父吟泰山之頂堪埋金噫嘻蜀道徒崎嶇南風來舜琴

梁父吟梁父吟佳人未偶頻傷心四時有恨秋偏深綠絲空滿簪

牛角歌

陳輔

牛角歌牛角歌日暮寒雲滿碧坡騎牛下山歸曲阿湖煙溼我蓑

牛角歌牛角歌浩浩者水魚弗過夷吾嚮說不我和嗚呼夷吾奈若何

悲昔遊

陳輔

昔吟梁父思泰山又歌牛角悲其寒鮑徐英魄今何在嶺雲關月空漫漫少強眼為傷時泣老大昏花心易忽石出題墨幾秋風人世功名杳無迹君不見漢千秋唐馬周立談徒步皆封侯賈生竟止梁王傳三世郎官虛白頭風雲自古雖難偶用舍何嘗繫能否但知信足任平生計度不如多飲酒願將梁父吟變作杜宇之聲音願將牛角歌轉調紫芝絃玉琴五陵石馬散黎軸惟有箕山青到今

五古

始作鎮軍參軍經曲阿

晉陶潛

重刊丹陽集元 卷之三十四 二  
弱齡寄事外委懷在琴書被褐欣自得屢空常晏如時  
來苟冥會宛轡憩通衢投策命晨裝暫與田園疏渺渺  
孤舟逝綿綿歸思紆我行豈不遙登降千里餘目倦川  
途異心念山澤居望雲慚高鳥臨水愧游魚真想初在  
襟誰謂形迹拘聊且憑化遷終返班生廬

車駕幸京口侍遊曲阿後湖

宋 顏延之

虞風載帝狩夏諺頌王游春方動宸駕望幸傾五州山  
祇蹕躋路水若驚滄流神馭出瑤軫天儀降藻舟萬軸  
允行衛干翼泛飛浮彤雲麗璇蓋祥飈被彩旂江南進  
荆豔河徼獻趙謳金練照海浦笳鼓震溟州貌眄觀青

崖演漾觀綠疇民靈騫都野鱗翰聳淵邱德禮既普洽  
川嶽徧懷柔

和崔侍中從駕經山寺

梁 蕭繹

鈞陳夜警徼河漢曉參橫游騎騰文馬前車轉翠旌野  
禽喧曙色山樹動秋聲雲表金輪見巖端畫棋明塔疑  
從地湧蓋似積香成泉高下溜急松古上枝平儀台多  
北思麗藻蔚綠情白 咄非照乘何以繼連城

行經季子廟

陳 張見正

延州高讓遠傳芳世祀移地絕遺金路松悲懸劔枝野  
藤侵沸井山雨溼苔碑別有觀風處樂奏無人知

贈丹陽橫山周處士

唐李白

周子橫山隱開門臨城隅連峯入戶牖勝槩凌方壺時  
作白紵詞放歌丹陽湖水色傲溟渤川光秀菰蒲當其  
得意時心與天壤俱閒雲隨舒卷安識身有無抱石恥  
獻玉沈泉笑探珠羽化如可作相攜上清都

侍從游後湖讌坐

權德輿

絕境殊不遠湖塘直吾廬煙霞旦夕生泛覽誠可娛慈  
顏俯見喻輟爾詩與書清旭理輕舟嬉游散煩劬宿雨  
蕩殘燠惠風與之俱心靈一開曠機巧渺已疏中流有  
荷花花實相芬敷田田綠葉映豔豔紅姿舒繁香好風

結淨質清露濡丹霞無容輝嫋色亦踟躕穠香射水木  
欹葉游龜魚化工若有情生植皆不如輕舟任沿沂畢  
景乃躊躇家人亦恬曠稚齒皆忻愉素絃激淒清旨酒  
盈樽壺壽觴旣頻獻樂極隨歌呼圓月初出海澄輝未  
滿湖清光照酒酣頰仰百慮無以茲心目暢敵彼名利  
途輕肥何爲者漿藿自有餘願消區中累保此湖上居  
無用誠自適年年翫芙蕖

泛曲阿後湖

劉長卿

元氣浮積水沈沈深不流春風萬頃綠映帶至徐州爲  
客難適意逢君方暫遊黃緣白蘋際日暮滄浪舟渡口

重修丹陽縣志 卷之二十四  
微月進林西殘雨收水雲去仍溼沙鶴鳴相留且習子  
陵隱能忘身世憂此中深有意非爲釣魚鈞

石翁嫗

宋 林景熙

東艾楚俗愚鑄金秦民怖何年斲雲根偶立此翁嫗干  
春衣莓苔偕老食風露世人輕結髮覆水或旦暮乃習  
無情緣永與天壤固停舟一訪古久欲祛此錮父老向  
我言曾是梁朝墓衣冠化黃土古邱亦成路當年殉金  
棺茲物獨如故闕世如過客興亡了不悟時借牛礪角  
敲火戲童豎

題陳少陽先生上書稟後

趙時瓌

虜騎昔長驅高屋建瓴水權姦誤家國和議甘散骸遂  
令九廟尊冒沒在棘枳帶甲百餘萬一嘯自披靡堂堂  
諫議公屹若頽波砥叩闔斥時宰不惜用一死此死不  
足道聞者自興起一木支大厦於時不可爾使早定大  
計何物糜研壘可憐紹興間賻贈官其子我得觀遺稟  
感慨甯已矣千載懷如生作者書於紙

湖上有作

陳 輔

平湖共天遠浸月坐寒光乘流溯荃壁掉舟尋藥房佳  
人折輕荷隨風來珍香顧盼但微笑睂宇何清揚日暮  
共攜手遙指煙中湘

過丹陽舊居

王存

漂泊經故園攜舟欵柴扉破屋他人居昔鄰今或非父  
老迎我飲祝我晝錦衣我謝父老言樸拙非所祈一官  
走塵土實迫寒與飢去鄉未幾載頗覺儔侶稀人事已  
可嗟况當白首歸泚泚練塘水綠楊蔭漁磯有田尙可  
耕誓將父老依

尋崇教寺

朱可大

杪秋風日佳天氣颯蕭爽十里亘經臺悠然成獨往晴  
雲斂巖谷宿露稀草莽霜葉含醉紅名泉漱清響我懷  
山水盟歷險窮幽賞脚著謝公屐手扶仙人杖浩歌歸  
隱篇猶喜逃世網仰視傑卓觀摩空起宏敞遂忘精力  
疲曲磴攀蘿上極目瞻天荒紛紜成萬象講經事已違  
古洞埋塵壤斜日半山陰徐行下深廣精廬訪僧伽禪  
定悟明朗寂寞生道心空無滅諸想淹留共伊蒲勝味  
真堪仰長嘯還故鄉清風隔霄壤

吳季子墓

元白珽

聖人如日月下照無黨陂藏珠與韞玉所得自華滋恭  
惟吳季子夙稟明睿姿近取子臧節遠紹泰伯基兩以  
大國讓廉風起蠻夷觀樂義已燭挂劔心如飴時方尙  
詐力子獨恪且祗時方事寇攘子獨甘棄遺孔子不到

吳聞風重齋咨佳城介申浦采地亦在茲特書寄餘哀  
豈不遐邇思蜿蜿龍蛟翥皎皎星日垂萬世懷道義取  
舍實繫之寄言邦之人無但覘首悲

練湖亭

明張存

孤亭倚太空修篁落疏影境靜心自閒頓覺塵事屏橫  
琴鳴冰絃古調誰能省顧此澹忘歸滿山秋月冷

石淙

孫育

野落生光榮鏘鸞下蘿徑窮巖留杖履幽尋足深興山  
泉薦清響溪毛雜盤飴四座集時髦分賡互參訂

詠料絲燈

薛惠

淮南玉為椀西京金作枝未若茲燈麗擅巧昆明池霏  
微狀蟬翼連娟伴網絲煙空不礙視霧弱未勝持碧水  
點葱鬱彩石染葳蕤霞疊有無色雲攢深淺姿婪蘭發  
香氣對燭映紅滋明月詎須侈夜光方可嗤

弔葛蒼公

國朝睦本

機槍忽犯斗禍亂適先後百六歲丁尼乙酉月在酉蒼  
公力戰時泐水已失守我父殉初六我公殉廿九奔跣  
扶柩歸熒熒方在疚灑血向昊天冀公能獲醜傳公雄  
水犀制勝北湖口初聞仗巖邑戎馬地深蹂復道渡閩  
關納約已自牖及有寄輓詞始知前否否今秋逢韓僧



重刊九陽縣志 卷之二十四 七  
目擊怒濤吼血戰落日紅利劔刃自手慷慨同盧公生  
氣猶赳赳我父遇九原同藉同心友我愧身未殉終天  
罪自負痛憶幼追隨豪飲兼使酒志不可一世心一無  
所苟落落狂與貧江上期不朽我今嚴父死哀號載稽  
首痛公復痛父哀衷莫能剖百痛既荒迷招些望喪軻  
英烈來雲中大節招九有

一碧萬頃亭 蔣清

閒事心幽討行行憩小山愛此百草薰時鳥聲間關密  
樹影空翠遙天窺蔚藍茗飲老衲供曠殿何處閒泉石  
無汲道臺圯罕躋攀練水天際明鷗鳥依輕帆羣峯屹  
五州九疊成蒼鬢山林自深阻猿鳥愁艱難川梁靡靜  
鱗觸石爭潺湲招攜度橋去大隱在市闔

吳季子祠下 王士正

我行延陵城懷古心苑結讓德邈已遠流風緬曩哲州  
來季當立高德甯詎屑躬耕表遐志亮哉子臧節慕義  
本無窮穹碑字難滅所悲于潛役國亂相更迭伍胥進  
勇士專諸踐王血遜位固高義復命忍臣列春秋不名  
賢書法理當晰嗚呼三代後斯風久淪絕廉節起頑懦  
尙論義常竊編紉思故人空祠颯霜雪

呂城 吳錫麒

川程期利濟旅泊淹荒陸雀聚城久空苔迷壘誰築頽  
陽隱寒薺淒響激喬木之子信霸才重任膺頗牧韜精  
託寤言勵志動淵矚永言君子慕肯負將軍腹部曲今  
已無旗鼓昔何肅雉堞緬蕭條沙鷗感洄洑時遇農夫  
言春耕拾遺鏃

暮過陵口

吳錫麒

貴賤非一致邱隴哀實同卽看黃屋尊終就蟻壤封朱  
方落日暮陵口蒼煙濛幽泉鳧雁去古穴颺颺通荆棘  
盛有時綺羅嗟已空都將歌吹聲吹入松柏風辛勤愴  
行役寂寞羈孤篷猶聞六朝水嗚咽西復東

謁季子廟

陳玉璣

入廟竦瞻仰屏容復徬徨幸生君子里來此酬椒漿青  
苔閉鼎迹白日淪空梁高風動遐溯豈云同子臧所以  
爭戰餘廟貌有輝煌

重經仙臺觀

賀來雝

景純愛丹鼎太白狎靈邱自古至人心偏於象外求重  
臺發遊趾云自謾母始擲簡探道妙飛茅度神跨古井  
埋元珠長松插碧水乘風千百年零落禾與杞延竝集  
清聽幽掬未及訶雲懶冒雕檻雀勁嘈寒蘿不知人語  
盡乃覺天風多我志頗好道常恐日如織願從安期生

金膏駐顏色念此神爲遊翩翩欲凌翼還顧方城墟於以謝廣繼

金牛洞

李應詔

危峯勢欲墜古洞森嵯峨日薄氣蕭爽夜來風雨多不見飯牛人空聞叩角歌

衲衣石

李應詔

我笑石丈人亦受金仙戒披此無塵衣獨立蓮花界不有米顛來何人爲下拜

謁桓王廟

劉守中

我今來西郊廟在湖之東云是桓王祠祭祀走村翁憶

昔則天朝唐祚幾告終鸚鵡起兩翼善喻推梁公赫赫惟桓王反正立大功女主紊天紀罪亦同元凶舉兵以申討徙之上陽宮三思几上肉操制在掌中如何遭反噬韋后亂君聰季昶昔遺書卓識人罕同豈知王有心議論休交訂刑罰國之柄留以待宸衷中宗旣復辟誅惡卽褒忠皇王苟祚唐禍變詎再逢精忠炳如日吐氣當作虹至今瞻榱桷歷歷護丹楓夜火靈旗來千載有英風

題張從申書十字碑陰

楊嘉樹

讓德重天下清風足吾師夫子留遺銘千載生光儀辭

重修丹陽縣志 卷之三十四  
約意復婉非聖奚能爲或謂聖人轍未嘗臨吳陞斯碑  
近贗託至今令我疑豈知越絕書所載非余欺句踐躬  
求賢雅奏往奏之祇因金石錄搜剔偶見遺永叔勿深  
考持論徒卑卑我觀陶靖節當年有替辭至唐開元朝  
仲容挺英姿奉詔重摹搨點畫無參差大厯歲己未蕭  
定刊於碑張公吳郡才司直貽芳規作書誌始末昭晰  
同筮龜碑雖有三本大小字各歧延陵讓王區傳信庶  
在茲我生千古後敢云旣已知竊惟季子賢良友宜爲  
詞於理有固然非緣膠己私展觀至聖蹟肅然起敬思  
惠山亭同賀樓雲丁石齋劉厚軒楊青谷家叔午

亭紫岩兄詒泉作

林植本

惠山無秀峰雄踞一亭獨聊因陵阜勢得窮登覽日東  
北多崩崖馬蹟駭相屬南瞻得夷曠田野雜樵牧其西  
面層湖遠勢拓神軸汲泓吸岩嵐衍漾混隄綠紛吾望  
遠心卽景易棖觸予弟正行役逢時學干祿昨獲燕京  
書苦道鄉園樂人生百年中萬事隨轉轂青雲非無階  
白日苦相促嗟哉吾黨心引分何求足湖山可乘輿豈  
在海與嶽近郭易登攀茲遊幸常續  
五律

曲阿對月

唐 劉長卿

金陵已蕪沒函谷復煙塵猶見南朝月還隨上國人白  
雲心自遠滄海意相親何事須成別汀州欲暮春

送李摯赴延陵令

劉長卿

清風季子邑相見下車時向水彈琴靜看山採菊遲明  
君加印綬廉使託惇嫠旦暮華陽洞雲峰若有期

泊丹陽與諸人同舟至馬林溪遇雨

皇甫冉

雲林不可望溪水更悠悠共載人皆客離家春是秋遠  
山方對枕細雨莫迴舟來往南徐路多爲芳草留

送丹陽趙少府

盧綸

恭聞林下別未至亦霑裳荻岸雨聲盡江天虹影長佩  
韋宗嬾漫偷橘愛芳香遙想從公後稱榮在上堂

湖上晚眺

權德輿

湖上煙景好鳥飛雲自還幸因居址近日覺性情閒獨  
酌乍臨水清機常見山此時何所憶淨侶話元關

送少清赴潤州參軍因思練塘舊居

權德輿

二紀樂簞飄煙霞暮與朝因君宦游去記得春江潮遠  
別更搔首初官方折腰青門望離袂魂爲阿連銷

自揚子江歸丹陽初遂閒居呈惠公

權德輿

移疾喜無事捲簾松竹寒稍知名是累日與靜爲歡蹇  
淺逢機少迂疏應物難只思閒夜月共向沃州看

送儲十二還莊城

綦母潛

西阪何繚繞青林問子家天寒噪野雀日晚度城鴉寂  
歷道傍樹曠隴原上霞茲情不可說長恨隱淪賒

晚夏歸別業

張祐

古岸扁舟晚荒園一徑微鳥啼新果熟花落故人稀宿  
潤侵苔螿斜陽照竹扉相逢盡鄉老無復語時機

憶雲陽宅

張祐

一別雲陽宅深愁度歲華翠濃春檻柳紅滿夜庭花鳥  
影垂纖竹魚行踐淺沙聊當因寤寐歸思浩無涯

夜歸丁卯橋

許渾

月涼風靜夜歸客泊巖前橋響犬遙吠庭空人散眠碧  
蒲低水檻紅葉半江船自有還家計南湖二頃田

送元詵還丹陽舊業

郎士元

已知成傲吏復見解朝衣應向丹陽郭秋山獨掩扉草  
堂連古寺江日動晴暉一別滄州遠蘭橈幾歲歸

送張翬下第

蕭穎士

俱飛仍失路綵服邇清波地積東南美朝遺甲乙科客

愁千里別春色五湖多明日舊山去其如相望何

雲陽驛陪崔使君邵道士夜宴 張子容

一尉東南遠誰知此夜歡諸侯傾皂蓋仙客整黃冠染翰燈花滿飛觴雲氣寒欣承國士遇更借美人看

丹陽懷古 宋邵彪

故里詩人去湖山最寂寥草深張祐宅花暗許渾橋風髓何時續蓬萍觸處飄鴻冥杳難及霜鬢兩蕭蕭

梁寶寺 湯喬年

田舍風光迥僧房意象深未窮千里目聊慰一時心遠樹輕煙入孤村落日侵自非真靜者誰復有幽尋

入山玉乳泉

李仲殊

玉液煎瓊螯泓澄一脈泉張生題品異丞相與名傳薦客流霞勝煎茶掇乳鮮祇園終古在長對白衣仙

別蘇養直 釋蘊常

老去難為別愁邊更著秋碧蘆園野水落日滿行舟雁斷西風急天寒古寺幽兩鄉無百里能寄短書不

過白鶴溪 明高啓

乍發白鷺洲今過白鶴溪溪流幾曲轉只在晉陵西月出女猶浣雲深猿自啼茅峯雖咫尺無計躡高梯

陳山道中 朱斗文

繚繞陳山路蕭疏古岸楓側身徐杖履蹇足奈蒿蓬髮  
鬢流雲暮冥冥落雁空巨靈劈倒處龍出玉泉中

丹陽曉發

祝允明

京邑到來熟曉行如赴家月明人渡水星散樹驚鴉燈  
影依依虛茶聲遠遠車蕭騷兩秋鬢無處定生涯

謁陳少陽先生祠

楊應詔

長劔俯巖阿危樓覆晚波獨來閒弔古傷感復如何社  
稷誰九鼎乾坤失兩河向來憂切疏忠憤見君多

沈山

楊志達

入山初問寺無寺更無山路盡偶然見門深常不關出

田僧種作立樹鳥緡蠻煙霧彌城郭何繇到此間

邑東二義閣

葛麟

已變龍蛇位還同虎豹羣不知誰作俑置爾欲無君炎  
漢尙如此孫曹安足云不禁予髮指叩闕寫彈文

湖心亭

孫嵩

別有一天地悠然坐碧空常懷流水意移入白雲中柳  
密藏啼鳥花香帶遠風漁舟歸隔浦棹破夕陽紅

權德輿故里

賀沈采

出郭尋芳躅煙橫路轉遙荷花溪上權楊柳岸邊橋大  
業何能繼斯人不可招夕陽衰草外獨立意蕭蕭



丹陽道中

黃元

五陵為客久，儒服滿塵埃。望闕無知己，還鄉愧不才。山陰殘雨度，河廣斷雲開。歸去多朋舊，春城共酒杯。

白鶴廟

蔣超

傳有青城客，依山結梵筵。壁懸金箭鏃，聲靜石壇煙。廢榻僧留偈，頽梁佛自肩。雲中一悵望，松柏總淒然。

月夜游沈山

朱祐

樵徑鐘聲落，循溪一叩關。寒泉鳴古寺，殘月寫秋山。客伴蛩吟寂，僧窺鶴夢閒。猶聞沈處士，華表夜深還。

呂城雪霽

王士正

鷄唱呂城鎮，日出市橋東。雪屋迴汀口，煙檣出竹中。鳥飛皆貼水，舟泛若乘空。古蹟成荒壘，行行憶阿蒙。

季子祠

沈德潛

斜日延陵郡，秋風季子祠。荒庭飛野鳥，老樹宿寒鴟。十字褒尼父，千秋喜並時。躬耕兼待命，懷古不勝思。

雲陽驛

沈德潛

舟過雲陽驛，遙聞車馬喧。漁家船作市，戍卒佛同門。過眼江湖下，驚心歲月奔。寄奴爭戰地，興敗與誰論。

游經山寺

姜藻

葱鬱經山路，尋春古寺隈。幽龕凝佛火，閒鳥落經臺。花

重刊丹陽縣志 卷之三十四 詩 三  
氣層巖出松聲隔嶺來名僧會駐錫遺碣鎖蒼苔

冬日過皇甫故居

丁有聲

支筇黃葉路云是舊時莊廬唱傳開寶才名匹孟王溪  
橋多半改松菊久成荒爲憶先賢傳西風雁幾行

拜季子祠

陳公位

讓德千秋迴尼山十字傳至今遺殿宇崇祀號嘉賢禱  
賽煩官吏鷄豚走市塵緣何被軒冕與志太相懸

練湖小泛

張自坤

小有亭臺處煙藏柳萬絲鷗心人與遠山意擢相隨春  
水欲成酒斜陽盡是詩此鄉多蠲稻還足慰秋思

吏部窪

朱西樵

此窪垂名久緣何不躋攀策筇循石徑游目轉泉灣楓  
葉霜中醉林花雨後斑佳城有餘戀明月照空山

白龍寺

國朝 華應春

白龍何日去池水尚泔泔冷浸中宵月陰生向曉雲山  
形連馬蹟地勢控狼墳怪底年來旱空修禱雨文

過經山阪

呂少棠

鳥飛難到處似棧碧空懸屐齒穿雲磴花香漱石泉荒  
村低樹外古寺落霞邊依舊高僧座誰參一指禪

辟塵石鼎

呂少棠

或疑神斧斲問石石無言雪浪同浮海塵埃不到門自  
饒苔蘚色長此雨風痕清磬一聲外吾心可共論

重過橫塘

荆履吉

詩人憶張祜買宅住橫塘愛此地古澹能令忘故鄉我  
來感陳迹時代閱千霜遮莫高吟處招魂廢井旁

游經山

劉守中

嵐翠四圍合松花吹滿衣雲搖山欲動石激水能飛寺  
僻煙霞古碑傳唐宋稀余生賦招隱此處結巖扉

仙人石

林壽春

天外數聲鶴仙人去不還空留一片石終古在人間明

月半溪水桃花兩岸山徘徊不忍去獨羨白雲閒

五絕

送元詵還丹陽

唐韓翃

過江秋色在詩興與歸心客路隨楓岸家人掃橘林

雨後懷湖上舊居

許渾

前山風雨涼歇馬坐垂楊何處芙蓉落南渠秋水香

丹陽作

陳存

暫入新豐市猶聞舊酒香抱琴沽一醉盡日卧垂楊

練水漁舟

明吉梁

萬頃吞天光一舟渺蓮葉載酒覓釣儔醉弄波心月

石潭秋月

吉梁

光動魚龍驚嬋娟此空好欲作清夜遊南樓興不少

北山樵笛

丁玘

山靜恣幽尋穿林坐芳樹悠揚樵笛聲更在雲深處

延陵孔碑

眭煜

高武讓國心濁世何能識幸生君子鄉徒自瞻遺畫

白鶴瓜畦

眭煜

天昌孫氏運適有此畦開渺渺雲中鶴無心自去來

練湖

國朝 吳錫麒

春水環三面人家住竹溪舟師下帆去沽酒練塘西

湖心亭

馬士圖

嵐翠重重繞荷風面面通湖光圓似月中有廣寒宮

仙人石

魏莖

山麓雲根卧形模宛爾留只緣仙蹟在片石亦千秋

五排

寄題丹陽孫氏七峯山房

明 何大復

聞爾山房盛青天秀七峯芙蓉疊日月雲霧裊青松塔

倚岳巒積窗通洞壑重丹霞互明滅瑤草自春冬靜得

沈冥趣幽探仙聖蹤源潭暗雷雨白晝有蟠龍

經邵氏五公祠

國朝 吉夢熊

宋代門才遠人文舊有聲嚴陵工作篆邵幕府善論兵

邵約授簡文思院邵銘勳秦鳳營邵循良三縣最邵景

博洽百家并邵世系堪徵信先嘗漫闕銘崇祠五公外

增祀禮方成

七古

題曲阿三昧王佛殿前孤石 唐劉長卿

孤石自何處對之疑舊遊氛氲峴首夕蒼翠剡中秋迥  
出羣峯當殿前雪山靈鷲暫貞堅一片孤雲長不去莓  
苔古色空蒼然

往丹陽尋陸處士羽 釋皎然

遠客殊未歸我來幾惆悵叩關一日不見人繞屋寒花  
笑相向寒花寂寂徧荒阡柳色蕭蕭愁暮蟬行人無數  
不相識獨立雲陽古驛邊鳳翅山中思本寺魚竿村口  
望歸船歸船不見見寒煙離心遠水共悠然他日相期  
那可定閒僧著處即經年

漕渠河成 宋顧致堯

兩岡相望山壁立地形脊高勢回瀦練湖寸板雖得尺  
度亭泄去如尾閘自從秦鑿興赭徒大業廣此肆遨娛  
歲久不治成痲瘵下視一綫皆泥塗

運河行 劉宰

運河岸丁夫荷鍤聲繚亂紅蓮幕府誰獻言運河泄水  
由函管函管掘開須到底運材歸府供薪爨庶幾一壞  
不可復民田雖稿河長滿民田爲私河則公獻言幕府  
甯非忠我聞此言爲民說急趨上令毋中輟小民再拜  
爲我言函管由來幾百年大者用錢且十萬小者半此  
功非堅厥初銖積費民力厥後世世期相傳豈但旱時  
須灌溉亦憂久潦水傷田向來久旱河流絕放水練湖  
憂水洩州家有令塞函管函管雖存誰復決小須雨澤  
又流通函管雖存不費工只今掘盡誰敢計但恐民田  
從此廢豐年餘年注江湖涓滴不爲農畝利有時驟雨  
浸民田水不通流禾盡死況今農務正紛紜高田須灌  
草須耘盡驅丁壯拆函管更運木石歸城闔呂城一百  
二十里不知被擾凡幾人太守仁民古無比凝香閣下  
甯聞此願將新令到民間函管須塞不須毀已填函管  
無尾闕大舶通行水有餘函管不毀民歡娛異時瀦瀉  
無妨渠憶昔採詩周太史不問小夫並賤吏試哀俚語  
扣黃堂鈇鉞有誅何敢避

練湖曲

元 薩都刺

練湖七月涼風通白水蕩蕩芙蓉紅芙蓉紅盡早霜下  
鴛鴦飛去何怱怱茜塘女兒弄輕碧鳴榔聲斷無消息

清波小藻出銀魚落日吳山秋欲滴望湖樓上雲茫茫  
鳥飛不盡青天長丹陽使者坐白日小吏開甕宮酒香  
倚闌半醉風吹醒萬頃湖光落天影掛冠何日老江南  
短褐綸巾上漁艇

大樹行

為經山銀杏作

明楊志達

大樹生平古日月身橫一丈縱百尺中開戶牖通游人  
豺狸不敢營窟穴衆山環抱風雨餘四面東西缺其一  
故爾西者枝枝垂世俗謬傳為拊佛老翁翻作小兒色  
鬱鬱芊芊自怡懌盤旋一樹衆樹成旁窺間種他枝葉  
昨朝秋老全如滌溪水飛黃山石凸自是浮華不可留

仍斂精神聳幹骨縣官處處搜山澤水師十萬須舟楫  
銀杏貪其年壽多但以空朽全天質乃知自古莊生達  
不肯逢時遭擯斥無用之中有用存君子奉為養生訣

和唐六如孫南山石壁題名原韻

有序

姜紹書

外大父中書七峯孫君吾陽高士也負雋才一時名公鉅卿騷人墨士靡不樂與之遊相思念命駕羣賢畢至往往見之圖詠流傳人間孫氏所居之南山石壁奇峭屹立江濱正德戊寅歲七峯與諸君修禊於石壁之下題名巖表以記勝遊其首為懸崖揮翰者乃楊文襄也從而和之者陳茶山段石庵張掌教馬紫溪鄭虛舟方棠陵與七峯凡七人其後孫曲水有七言絕句謝梅岐有六言短章復題雲壑二字於其額唐六如圖兼題長歌於其首雖西園雅集不是過也

余追慕涓陽遣人搦之其摩崖之刻已半泯於風雨惟六如圖詠尚焜耀於天壤間七峯之藉以不朽者不在金石而在縑緙矣余因和六如先生韻二首以俟桑梓之彥如葛常之著韻語陽秋者採之以登邑志云

石骨嶙峋露蒼壁一點芙蓉天外立江濤遙浸翠微寒  
雲氣常封苔蘚溼七峯高士稽阮儔四座琳琅偏好客  
客星每動太史占雅集西園欣灑墨飛梯懸磴記芳名  
黃鶴靈芝鐫鐵筆六如仙子染緗素五百年來扛鼎力  
畫圖三見歲庚辰曾並摩崖傳正德千秋應有六丁護  
玉躑金題存舊蹟只恐夜深風雨中虹光射斗蛟龍泣

其二

浪漱雲根驚峭壁靈鷲飛來江上立霜凝危岫薜蘿寒  
露墜空林松桂溼南山小隱真奇士北海清樽俱上客  
燒餘竹漑祗烹茶磨遍松煤堪潑墨伯虎前身顧虎頭  
興酣盤礴力留筆掣管迅如風雨來驥渴鴻驚憑腕力  
石淙墨興垂琬琰風雅不孤徵有德紀元前度是庚辰  
驚喜百年傳舊蹟雲巒幻出蝌蚪文蒼頡書成鬼應泣

王燈歌

有序

國朝 湯寅

潘鳳工畫從楊文襄公遊於內家見琉璃屏因悟為絲燈工巧極矣而王五始於燈上作參差凹凸狀山水人物一一精妙周宜興當國極稱賞贈遺甚厚呼為王燈

春風欲溢梅花酒月色初懸薊門柳武皇宴坐號昇平



鳳吐龍銜夜合笙是時楊公集賢院畫工潘生最深眷  
上苑星橋吹女夷驂驪處處相追隨琉璃屏風內家見  
踏歌宜照燈前面蟠螭動鯨那可稱潘生巧變作絲燈  
迴看青玉忽無色便銘金羊未足矜一時雅譽春城滿  
練塘十里珠簾捲鏤脂映玉參差紅裝成七寶仍玲瓏  
潘生去後絕無後二百年來失好手邇來何人遠擅場  
高名海內傳王郎爲贈杜家一匹絹搦作亭臺帖雙燕  
人物還師顧長康韋偃老樹尤蒼涼銅絲作骨隨十指  
巴陵之山巴東水不用春風用剪刀誰家花草著春條  
更翻彝鼎明深院擬作桃源擬西苑人間物態總尋常  
九微光裏分明見只此夜遊吾已足畫堂莫惜催紅燭  
茱萸幔子垂蓮花漫使情人教碧玉宜興相國雅嗜奇  
五夜吹簫金屈卮無限銀花總堪擲獨許王郎稱上客  
自爲公作灞橋圖灞橋驢背酒家胡生韻絕勝摩詰畫  
此中真可安茅舍相國攜見坐上賓此公巧藝應有神  
當今鮑謝殊可作此燈十萬那能索滿堂詞客皆絕倒  
一時悵望公孫閣誰道芸暉事惘然王郎塵埃老最憐  
苦心經營猶未暇無復豪門舊聲價世事反覆難重陳  
貴賤得失何足嗔王郎王郎藝絕倫此是披香殿裏春  
同楊西印蔡韶若夜登觀音山眺曲阿後湖

王士正

我昨南渡登金焦鯨魚跋浪生風濤更上君山俯震澤  
長江萬里窮秋毫五日探奇興不盡曲阿城畔來登高  
觀音山高高百尺星辰羅列捫層霄懸崖絕磴掛猿臂  
崇巒疊嶂森松毛山巔作亭瞰飛鳥湖光山色相週遭  
練湖一萬六千頃勢與江海爭迢遙淵注渟著古所歎  
滄桑磨滅非前朝風景不與謝郎死我來憑眺凌寒霄  
長嘯空山答山鬼驚飛鵬鵠求其曹滄波混茫接元氣  
有如盂水浮堂坳馮夷擊鼓百靈集金支翠羽光飄搖  
是時月黑風怒號萬弩突射錢塘潮蛟龍鼉屨時隱現

靈胥慘淡天吳驕高驪長山互鉤帶六州一氣迴斗杓  
楊公蘄黃昔開府坐清江漢真人豪蔡生白皙美無度  
頗能飲酒歌離騷東吳菰蘆有君輩力鞭巨石驅神鼇  
練塘一勺好樓託結鄰未卜心空勞酒闌歌罷意惆悵  
煙江明日橫輕舸

題睦孝廉傳後

孫枝蔚

鄭虔不死芸香閣反覆歸朝名已惡王維淚灑凝碧池  
微官得罪亦何辭孰似丹陽睦明衣冠不敢辱周孔  
惜哉奇計滿腹中未得早獻明光宮老作廣文遭禍亂  
烽火光中弟子散事後誰爲痛哭人惟有深山老逸民

權德輿故里

彭 澧

雲陽郭西日練塘練塘之水何蒼蒼記得元和宰相里  
幾隨禾黍變滄桑先世三秦著奇節中原爭說秘書郎  
兩拜高官不肯受蕭然一劍渡南疆秘書之後君也出  
汗駒千里踏飛黃早歲聲傾裴與杜黃金臺上走文章  
京華公卿爭倒屣朝陽一鳳鳴高岡風流相業排閭闔  
仰看三台列宿鉅等身著述盈箱帙翰墨淋漓達夜郎  
卜居不近囂塵市結廬常占水雲鄉到今寥落荆棘滿  
空餘白練杳茫茫我欲從之不可得岸葦漁汀水一方  
君不見少陽布衣上書奏天子石城舊迹遙相望又不

見諸葛將軍誇第宅白鶴溪前上北邙人生何必雕闌  
玉砌窮歌舞何必朱房曲戶擬侯王但使勳名垂竹帛  
乃如公者名益彰遙指湖頭春色裏湖水天光相映長

神亭懷古

姜 藻

春山白鶴盤空起獅兒逐鹿來南里大喬初嫁愛提戈  
奇絕神亭史書紀曾從暇日費搜討春風載酒延陵道  
延陵城郭莽蒼間爲訪亭基沒青草平原竹樹隱深煙  
竝立搔首懷當年伯符進擊劉繇將亭隅似雪排戈鋌  
狂吼一聲衝亂矢日落雲深戰不止縱失兜鍪詎震驚  
反戈刺敵花驄死自後威名薄海馳帳下新降太史慈

重刊丹陽縣志 卷之三四 三  
英雄不記射鈎怒執手笑問神亭時當年意氣真豪舉  
英雄一去成千古我浮大白作高歌精靈有知應起舞  
嗚呼英雄誰繼長沙王難弟慶亭會射虎

練湖晚泊

荆德珩

刺船未得隨輕鷗上湖已阻下湖流伊昔湖光千頃碧  
一丸明月蘆花秋長山飛派七十二高原並向雲中投  
四顧蒼茫天水接依稀霄漢浴斗牛經冬漕舟千里集  
運河如綫泥沙浮何以濟之達大江有湖引滿通咽喉  
我聞神仙拔宅去雲霞掩映空中樓滙爲大澤良有以  
蓄洩天然在寒洲豈獨菱芡資民利實佐輸將代國謀

或云滄桑無定轍膏腴頃刻成耕疇紅稻花香綠蘋冷  
盈盈十斛豪家收田烏啄粟肥且眾浴鳧飛鷺飢不遊  
雖有汪洋餘半壁濟漕不及徒悠悠惡風白日兩相激  
甚或決突貽人憂江南財賦甲天下溪橋水澗滋淹留  
乃驅窮簷事畚鍤泥首塗足冰霜稠年年臘底鞭箠督  
浪擲金錢填巨溝我行欲濟誰爲楫坐卧小艇垂魚鈎  
煙波縹緲接風雪漫學巖子披羊裘安得牙檣徹夜渡  
高燈千點懸星球古人版築豈無謂啓閉以時深持籌  
上者爲隄下者聞追循往迹猶堪求或堅如壘隱金鐵  
或整如工費雕鏤澎湃如或擲急鼓悠揚如或憂輕球

重刊丹陽縣志 卷之三十四 藝文 三  
止或如鏡拭塵翳注或如阪奔驪駟放湖一寸河一尺  
或呼卽應如相酬有時防固或加密涓滴不惜如相讎  
永晝種種救時切可惜石渠傾未修倘以河工補堰費  
較省頻歲科征不不循前智營纖悉何異鵬徙笑蜩鳩  
時夜將半寂寥甚滌洄悵望空凝眸嗷嗷羣雁叫寒渚  
隱隱疏星橫釣舟曾空漏靜息垂餌扣舷悲嘯驚潛虬  
煙林模糊同一抹屈指今古蹟難侔永勒三犀來兩鵠  
挾書欲獻曾何由君不見南旺湖當分水廟人移天巧  
安陽侯黃河之水星宿下約束南行幾百周以茲擁過  
爲利涉萬國喜王符金甌況復漕湖有成議忍令棄置

隨浮漚開家仙蹤杳莫識綵雲飛夢大江頭揚帆何日  
趁湖去衢歌願附登皇州

陸嵩年先生草書歌

呂叔蘅

古來草書推獨步前有張顛後懷素南宮米氏亦擅長  
餘子紛紛無足數嵩年陸公人中豪跌蕩翰墨輕章句  
閒來作字字體殊紙上彷彿生煙霧有時明媚巧合宜  
花卉離披春景暮傾欹兀岸勢倔強鸞飄虎攫蛟鼉怒  
縱筆橫掃忽數行岡巒綿亘陰山路詭行變態不可窮  
興酣豈惜俗眼怖晴窗展卷長歎嗟轉恨斯人邈難晤  
憶昔教授官華亭鹿洞鵝湖同法乳勝代失守我朝

興淋漓血濺宮牆樹乃知點畫爲小技雄壯獨出肝膽  
露何以學士宋王孫工書終被簪纓污

題睦嵩年草書後同呂均來作

劉奎年

睦公氣節昭日星作事往往追前型留傳草書亦末節  
獨以神骨不以形呂生邀我披此軸頓覺寒氣生中庭  
飄如健鶻下霄漢矯如猿猱緣青冥淡如春煙拂巖岫  
迥如折戟沈沙汀龍蛇風雨互爭鬪咫尺恍惚驅羣靈  
欲歌欲泣意騷屑令我目眩心魂驚爲憶有明壬午榜  
吾邑五人同競爽睦公一棹溯淞江坐擁皋比目無兩  
都城失守三日哭就義從容何慨慷至今片紙落人間

猶作千秋遺表想末俗人心愛嫵媚風流無復追抗爽  
可憐文采亦消歇致使寥落悲吾黨君不見睦公同年  
葛中書詩名卓犖無人賞

麥舟橋懷古

東南薰

渡頭楊柳東風急波光帶雨春帆溼范氏高義何處留  
小橋倚杖徘徊立緩急誰堪足恃者推解交情世所寡  
但恐年深事失真徒勞遍訪來隄下來公因以名其橋  
麥舟古誼今遙遙我來一度一回首鄙吝忽逐溪雲消  
俯仰滄桑無限意當年勝蹟橋空記散步斜陽大道邊  
老人猶說忠宣事

弔姜孝子壁如

趙翼

帷堂忽驚煙燄裏不見父棺但見火奮身入救命已拚  
不知有火但父棺斷礎頽垣劫灰紫嗚呼孝子此中死  
我聞至孝通神明雕胡之飯紫石英姜家故事更靈異  
舍旁湧出江水味君胡不幸戕其生洪鑪一燎鴻毛輕  
謂天有昭鑒何不反風迴烈焰謂天竟不知又似孝感  
全父屍嗚呼此理不可詰父棺不燬兒願畢

九日登仙霞閣塔

顏熒

浮圖七級高嵒竦衣直上摩蒼穹閒雲飛鳥出其下  
雙耳浩浩聞天風茅峯指顧列掌握經嘉諸岫青叢叢  
蓐收殘暑布秋令山川爽颯明清瞳安得煙雲朝夕盪  
胸臆一洗世態心神空長房仙人吾所師茱囊菊把繫  
我躬聳身塔頂生羽翼欲叫閭闔開鴻濛臨風振毫寫  
突兀樹葉颯颯搖丹楓

望仙墩懷古

姜景華

焦孝先東漢賢齊名韓康與梅福屢徵不起去學仙焦  
山舊隱廬屐齒嫌紛然脫身棲託歸真觀潛心修煉經  
十年丹鑪夜攝六丁守光明忽放岑樓顛照徹琉璃大  
千界金銀宮闕虹橋連氣爲車兮風爲馬雲中君兮來  
翩躚接以綠玉杖導以翠罕旃倏忽上升倬漢凌煙董

雙成笙飛瓊瑟嘹亮帝樂鏗鈞天山鄰驚起競開戶穿  
林越莽趨墩前仙乎仙乎不可接已在虛無縹緲碧落  
之雲邊今我躡高墩亦復心拳拳登臨聊學蘇門嘯喚  
起野鶴猶孤鶩

自題呂城雜咏

黃之晉

客有讀詩而笑者日子何見之小也子不問談天鄒海  
內海外八十有一州子不問行地豎極東極西五億十  
萬步子雖不能破萬卷窮萬里然而山經水經亦會緇  
過寸寸紙山程水程亦會踏穿隻隻履曷不記廣輿圖  
益地補郭璞註續張華志賦不讓都三與京二詩亦不

問邯鄲道京洛行巫山高蜀道易黃鶴狂吟謫仙避金  
陵懷古元白廢而乃眼一寸光筆三寸許寫此呂城一  
尺土入甕醢鷄入角戩鼠蛙鳴於井蟀鳴戶誰爲吳下  
蒙或類齊東語柱下之史不屑取輜軒之使不暇數旗  
亭之伶不堪睹客來前吾語汝吾身不能九畝橫目不  
見雙眉生忽近圖遠昏非明與其靈運作賊搜山林孰  
若南冠土風鍾儀琴與其向平作客待婚嫁孰若萑蕩  
鄉味陸雲話何況賤子身薪勞而萍泊家有廡賃舂業  
無田負郭不經行路難不識此間樂每向他鄉吟故鄉  
一兩句成三百躍太歲在戊六月初其時日下迴征車



里人示以竹枝句前者唱喁後者于就中后山老許我

家派西江圖

自註陳文學贊卿丈嘗贈予詩有山谷前身語

我聞巴渝竹枝劉

賓客西湖竹枝楊老鐵後來千萬篇吟到國外國

尤西

外國

竹枝我猶未免為鄉人姑與鄰女同其顰孫吳築城宋

置鎮俯仰于有六百春零星掇拾得百首詞繁意復非

無因曲阿文獻頗零落志乘百年筆都閣練侯既飛鳧

劉叟又化鶴

謂練笠人邑侯劉明經時庵

不抱徵文考獻心經山練

水嫌蕭索我詩可不作志不能作詩乃託作詩可不多

詩多欲補志所略持此謝客客日諾於是錄詩為一編

而復以詩代序為一篇

修陵石辟邪歌

虞攀桂

壽陽兵起臺城空南梁王氣蕭然終捨身佞佛竟餓死

修陵片石啼酸風曲阿之北東城路云是當年梁帝墓

辟邪欹側卧荒原殘碑斷碣知何處憶昔坐鎮南雍州

蕭郎豪氣侵諸侯左抱湖湘右巴蜀江南傳檄戈爭投

時事遷移變城郭烽煙滿地驚河洛青絲白馬城下來

落日荒涼瓦宮閣一聲荷荷佛無靈蔓草寒煙委巖壑

翁仲無言對夕陽金烏玉椀同蕭索摩挲此石心無聊

苔纏蘚蝕風飄蕭同秦浮圖竟何有江陵圖籍煙塵消

爾今倒卧空山曲月冷霜淒形躑躅何人麥飯哭南朝

寒食年年芳草綠

七律

丹陽東去新亭

唐皇甫冉

姑蘇東望海林間，幾度裁書信未還。  
常在府中持白簡，豈知天半有青山。  
人歸極浦寒沙廣，雁下平蕪秋野閒。  
舊日新亭更攜手，他鄉風景亦相關。

待漏假寐夢歸江東舊居寄惠閣黎茅處士

權德輿

十年江浦臥郊園，閒夜分明結夢魂。  
舍下藤蘿通古寺，湖中煙雨到前軒。  
南宗長老知心法，東郭先生識化源。  
覺後忽聞清漏曉，又隨簪珮入君門。

秋晚雲陽驛西亭蓮池

許渾

心憶蓮池秉燭遊，葉殘花散尙維舟。  
煙開翠扇清風晚，水泛紅衣白露秋。  
神女暫來雲易散，仙人初去月難留。  
空懷遠道無持贈，醉倚闌干盡日愁。

送王總下第歸丹陽

許渾

秦樓心斷楚江湄，繫馬春風酒一卮。  
汴水月明東下疾，練塘花發北來遲。  
青蕪定沒安貧處，黃葉應催獻賦時。  
憑寄家書爲回報，舊居還有故人知。

重遊練湖懷舊

許渾

西風渺渺月連天共醉蘭舟未十年鵬鳥賦成人已沒  
嘉魚詩在世空傳榮枯盡棄浮雲外哀樂猶驚逝水前  
日暮長隄更回首一聲鄰笛舊山川

懷丹陽舊居

許渾

兵書一篋老無功故國荆扉在夢中藤蔓覆梨張谷暗  
草痕侵菊庾園空朱門跡忝登龍客白屋心期失馬翁  
楚水吳山何處是北窗殘月照屏風

過張處士祐故居

顏宣

憶昔為兒逐我兄曾拋竹馬拜先生書齋已換當時主  
詩壁空題故友名豈是爭權留怨敵可憐當路盡公卿

柴扉草屋無人問猶向荒田責地徵

和顏宏至過處士張祐故居

陸龜蒙

張祐字承古作官體小詩辭曲豔發當時輕薄  
之流能其才合謀得譽及老大稍窺建安風格  
誦樂府錄知作者本意短章大篇往往間出諫  
諷怨譎意與六義相左右善題目前佳境言不  
可刊置別處由是賢俊之士及高位重名者多  
與之游謂有鶴鷺之野孔翠之鮮竹柏之貞琴  
磬之韻或薦之於天子書奏不下亦受辟諸侯  
府性狷介不容物輒自劾去以曲阿地古澹有  
南朝之遺風遂築室種樹而家焉性嗜水石常  
悉力致之從知南海間罷職載羅浮石笋還不  
蓄善田利產為身後計死未二十年而故姬遺  
孕凍餒不暇前所謂鶴鷺孔翠竹柏琴磬之家  
雖朱輪尚乘遺編尚吟未嘗一省其孤而恤其  
窮也噫人假之為玩好不根於道義耶懼其怨  
刺於神明耶天果不愛才沒而猶譴耶吾一不  
知之友人顏宏至行江南道中訪其廬作詩弔

重刊丹陽縣志 卷之十四  
而序之屬子應和子汨沒者不足哀承吉之道  
邀襲美同作庶乎承吉之孤倚其傳而有憐者  
勝華通子共悲辛荒徑今爲舊宅鄰一代交遊非不貴  
五湖風日合教貧魂應絕地爲才鬼名與遺編在史臣  
聞道平生偏愛石至今猶泣洞庭人

過丹陽

吳融

雲陽縣郭半郊明風物蕭條萬古情山帶梁朝陵路斷  
水連劉尹宅基平桂枝自折思前代藻鑑難逢恥後生  
遺事滿懷兼滿目不堪孤棹倚荒城

丹陽道中有感

宋王安石

數百年來王氣銷難將往事問漁樵花方秦地皆蕪沒

山借揚州更寂寥荒埭暗雞催月曉空場老雉挾春驕  
豪華祇有諸陵在往往黃金出市朝

練湖春霽

蔡肇

春入池塘綠漲初蒲根水暖戲鷗鳧雜花開處自深淺  
細雨漾空如有無風外鐘聲聞遠寺柳間帆影出平湖  
冥搜竟日耽佳句不負宗生來畫圖

題蘇養直詞

曾慥

元祐文章絕代無爲主盟者睂山蘇舊聞宗匠爲詩匠  
今見東湖說後湖寂寞香山老居士浩蕩煙波古釣徒  
瀾翻翰墨驚人眼一段清冰在玉壺

題季子廟

楊傑

戰國并吞禮義微  
延陵高節救周衰  
當時若嗣諸侯位  
後世誰傳十字碑  
生死不欺留劍約  
興亡都有審音知  
名儒重欲修前史  
列傳應須次伯夷

過練湖

顧松年

行行何以慰吟觀  
負郭平湖萬頃寬  
兩寺鐘聲煙外聽  
六朝山色鏡中看  
難追鷗鷺朋儔密  
頗怪魚龍窟壑寒  
請濯塵纓自茲始  
爲辭雲水向長安

恭被詔書褒贈陳公忠義痛感有作

李綱

哀痛綸音灑帝章  
賜金增秩喜非常  
無心聖主如天地  
著意奸臣極虎狼  
忠血他年應化碧  
英魂今日已生光  
先生憤懣誠昭雪  
九死南阡豈自傷

平昔初無半面交  
危言幾辨蓋寬饒  
幽冥我已慚良友  
忠憤誰能念本朝  
故國遙看雲杳杳  
新阡何處草蕭蕭  
撫孤未遂山濤志  
誰繼離騷付大招

春日遊仙臺觀

張惟恕

脫落塵襟散曉衙  
春深騎馬到仙家  
日高影動紅梅樹  
風暖香生黃菜花  
樓觀倚雲喧鳥鵲  
池塘圍柳護魚蝦  
興來緩步清溪上  
欲學張騫一泛槎

練光亭

楊蟠

寒光萬頃澹高秋，粉壁朱欄客愁晚。日蕭蕭聞落葉，晴天歷歷數飛鷗。煙橫絕島疏難掩，月在平波瑩不流。懷抱未忘知有處，且和風笛醉滄洲。

丹陽道中觀稼

元張雨

行遍山東黃葉村，縱橫草路細難分。荒鷄戶暗蠨蛸月，落鴈天黏穉稷雲。下澤車傍懸酒榼，延陵祠畔讀碑文。空山更覓牛羊徑，人獸依然不亂羣。

臘盡過練湖

薩都刺

獨倚牙檣數客程，殘年風景促鄉情。寒天半夜無人語，

明月滿船聞鴈聲。雲外好山如有約，煙中野樹不知名。來朝烏鵲橋頭鬧，應是人家出戶迎。

宴丹陽道院題壁

楊廉夫

因過南州處士家，青山列館是煙霞。臺西客去星連閣，橋上僊歸鶴問瓜。御史撰文霜凜冽，僉亭寫竹玉交加。丹陽道上能留客，十一茶泉獻乳蘂。

過丹陽陳少陽祠

明陸深

郵籤初下雲陽驛，國士猶懷陳少陽。人世自應餘感慨，東風原不管興亡。誰無一死甯須晚，事到千年更有光。當日上書多輟報，至今遺恨說汪黃。

登觀音山亭

丁鴻陽

絕巘孤亭許醉登，重湖入望碧波澄。  
帆移松頂隨飛鳥，寺出林間覆古藤。  
煙雨萬家懸雉堞，水雲千頃泛漁罾。  
汲來玉乳泉堪煮，坐月談空欲共僧。

丹陽道中次王直夫韻

文徵明

句曲東來草樹秋，車音隔隴思悠悠。  
西風黃土污人面，落日青山觸馬頭。  
息影道旁分茂蔭，濯纓橋下得清流。  
平生笑殺朱翁子，辛苦剛酬妾婦羞。

嘉山龍母祠

睦石

雲石淋漓古洞陰，澄潭寒色照空庭。  
樓臺曉霧含光紫，草樹斜暎帶雨腥。  
山繞延陵煙漠漠，江浮建業浪溟溟。  
松門樵笛歸何暮，萬壑長松起梵音。

宗公弔葛蒼公先生泖湖殉難

任立

焦桐閒試只孤彈，懷仰忠貞思渺漫。  
氣節獨能全大義，英風當足挽狂瀾。  
門前榆柳煙橫暗，架上詩書月照寒。  
回首昔時重感觸，卻憐同社半凋殘。

湖亭和東里師韻

睦明永

入窗懸磴綴林邱，片片飛帆屐底浮。  
檻倚嵐光來木末，尊虛日影瀉湖流。  
頰霞贖向山隅照，高鳥還成雲外遊。  
數里松陰看蔽芾，琴觴小憩足千秋。

白鶴山懷古

楊志達

白鶴孫公自古邱降靈特異我神遊一江火赤奸雄壁  
二女顏紅故主樓大為漢朝增氣色尤於吳國衍春秋  
東南險阻今何在賸有瓜田起暮愁

謁陳少陽祠

國朝 張九徵

宋代園林秋草邊夕陽遺址尚依然松杉剝落英靈在  
父老悲吟諫疏傳彈指已成厓海月傷心莫話靖康年  
宗公祠墓遙相望兩地忠魂泣杜鵑

辛巳同戴應舉遊經山寺觀 皇子賜卧松雲廬

額敬賦

馬驥

萬山如洗映晴空古寺蕭疏一徑通花雨欲飛談慧業  
松雲穩卧仰宗風新書天矯冲霄鶴老樹婆娑破壁龍  
從此寺中添故事遊人不數晉遺蹤

登丹陽望湖亭

黃九河

蠟屐登臨破曉煙望湖亭子峙湖邊千年風雨誰家宅  
百頃菰蒲幾處煙鴻雁不來餘稻粒城闌欲斷見山巔  
坐深獨耐秋衣薄為愛波光未忍旋

游馬坊寺

即延壽寺明萬曆朝張太后建

姜志鉅

梵塔穿雲樹渺茫南朝舊寺甲朱方門搖黍綠高低色  
院落槐黃歷亂香古壁畫禪呼欲出老僧說法石為狂



重刊丹陽縣志 卷之三十四  
層樓更上頻依檻眺望空濛接帝鄉

題陳少陽祠

湯寅

痛哭煙塵劫未消已聞良嶽草蕭蕭豈知玉輦終三竺  
尚訝丹陽是六朝柳葉湖深低有廟鷓鴣聲急去無橋  
一龕燈火花如雪莫問西泠渡口潮

舟過丹陽有感於范堯夫事

查慎行

郵籤朝過曲阿城又是江東第二程一刺投名羞俗態  
十年為客見人情當時已少郭元振故友誰如石曼卿  
預遣家書刻歸日兒童不用遠相迎

丹陽

李孚青

陳迹荒涼暮笛哀曲阿城畔遠煙開酒醺北府隨潮至  
路轉東吳入畫來殘雨練湖流晉水野風馳道起秦灰  
沈山不見尙書宅惟有漁樵自往回

陳少陽祠

荆摺

神霄良嶽事堪傷泥馬南奔勢頗張九域已淪惟楚越  
六奸纔去又汪黃祗留公論存膠序不道誅夷到國良  
俎豆千秋垂不朽歸樓高鎖尙飄香

延陵祠

賀鑒

漁竿城畔望丹邱公子曾經此地遊縞紵已非吳帶礪  
滄桑猶記越春秋禾香羽翠標銀漢荻影鷗房靜綺流

舊堞亭碑相向立

庭前有孔子十字碑

賢名聖德古今留

宛委山堂陪徵君姜上均

吉夢熊

桐廬插架列縹緗  
詰訓羣經鬢有霜  
願我欲逾皇甫序  
對君疑入鄭公鄉  
石渠往日論同異  
玉尺何人校短長  
剪燭劇談忘漏永  
故家人物盛山堂

九日登丹陽三義閣塔

仲鶴慶

不奈蕭條客裏秋  
憑高聊復遣閒愁  
雲邊山色纔平檻  
天外江聲欲上樓  
一帶煙林低夕照  
半空人語落寒洲  
鄉園回首知非遠  
籬下黃華開徧不

土莊定公墓

賀際昌

左丞遺墓逼城堙  
草色萋萋映暮春  
萬馬並馳能駐足  
五朝歷仕得全身  
嗣王覆轍慚胡域  
故老豐碑護後人  
東望六陵煙草潤  
冬青花樹久成塵

和吉渭厓試院呈主司並分校諸公韻

魏晉錫

春陰棘院鎖青苔  
帝簡宗工領袖來  
座上玉壺冰共朗  
海中珊瑚網初回  
謂視學銀袍鵠立千行靜  
彩筆鸞停五色裁  
最喜追陪依正眼  
卻教雲霧撥全開

十年杖履侍傳詩

自庚寅入都計已十載

敢擬斯文共所司  
吾黨

扶輪雖大雅一時躍  
冶漫矜奇單衣未著春  
猶健官燭

分燒手自披試汲孤泉嚴木監寸心寒冽許同知

謁陳少陽公墓

郭定

六奸請斬奏彤宸太學孤忠邁等倫只有歐陽爲義侶  
獨知忠定是名臣親征未報三千旅賜祭空殞五百緡  
差喜汪黃同鑄鐵墓門屈膝跪逡巡

管山閒眺

姜鳳起

蕭齋門設亦常關最喜開門卽見山煙鎖竹林濃淡外  
雲移松嶺有無間詩中風月饒幽興畫裏樓臺破笑顏  
何日扶筇登絕頂一聲長嘯謝塵寰

謁陳少陽祠

於震

兩宮消息正茫茫廟算徒聞罷李綱不信九關司虎豹  
直留三疏動風霜衣冠白日悲東市松柏青燐照北邙  
賴有史書遺直在里居猶自溯丹陽

黃塘丹井

荆念閔

煙鎖黃塘紅葉村千年丹井尙留名鶴歸華表溪留影  
人上經樓松有聲是處亭臺疑閬苑幾時鸞鳳下瑤京  
踏歌人去蓬山遠空記吹簫到碧城

秋晚過湖心亭

荆家瑁

晚秋放艇蕩清溪獵獵寒風詩思淒菰米波漂千頃碧  
亂山雲護萬峯低歸來陶令空名縣老去蘇公尙有隄

重刊丹陽縣志 卷之十四 詩 三  
誰向棠陰更回首敗荷殘柳望中迷

雲陽懷古

荆德韶

山城雉堞鬱巉嶢孔道相傳自六朝檣櫓南浮通閩浙  
雲煙西去接金焦難尋處士東瓜堰尙識詩人丁卯橋  
多少高賢題詠處開湖風月未全消

重濬玉乳泉

陸桂馨

南徐風景昔豪奢選勝來遊競鬪茶紺宇只今滋蔓草  
石欄依舊印苔花每逢甲子開新象再覩希元肇錫嘉  
端賴騷人搜古蹟重將修綆汲靈窪

陳少陽祠

沈德潛

宋代園林草木荒儒生祠宇獨靈長堂堦日落松杉冷  
奏疏霜寒史冊光肉食從來輕社稷草茅自古繫興亡  
知公地下多遺恨南渡君臣負李綱

陳少陽祠

洪亮吉

少陽祠外駐征輪國士應知俎豆尊已覺舉朝忘二帝  
不妨在野蹈三仁捐軀子諒彈仙客並世朱雲值佞臣  
一樣書生心跡異酋前叩馬又何人

丹陽懷彭晉函

王文治

都下分襟又隔年經過梓里一淒然孤鴻去國跡無定  
老鶴向人鳴可憐荒草夜聽江岸雨綠楊春浸練湖天

此行何處通音問滄海茫茫萬里煙

春日經山崇教寺集聖教序字成七律四章

吉鍾穎

歸來萬里駐征輪歷盡名山記不真過眼雲煙成往蹟  
開懷風月悟前因同遊物外添游趣得見人間未見春  
年老登臨猶有志於今躡履洗心塵

雲陽崇教古禪林不攬幽棲不見深方外煙花皆道味

此間山水有清音勝形拱抱非迷眼福地根基總在心

時因覓地至此想像當年開異境洞空猶說洞中金金牛

松聲花影梵王宮香積菩提濟不窮菩提井九曲河流春

水至六朝陵墜夕陽空虛心翠罕方其外竹象眼清常

宛在中象眼泉小住崇巖精舍啓機雲幽興忽然同時借林潤

湖一桂兩茂才住寺中

經山古寺建何年此日登尋夙有緣仙佛同源雙石在

仙人石晉唐遺迹一時遷寺建於晉咸康間唐時重建寺前有銀杏一株大四十圍

衲衣石相傳為東晉時物吾祖猶及見之無香不妙花成雨雨花台是色皆空月

印川翰墨詞高慚述德難將步履續前賢乾隆壬寅大父銀臺公有

經山入詠詩

懷呂城舊居四首之二黃之晉

未拜瀧阡十載更難忘涕淚鮮民生離雲况感扁舟夢

癸丑冬姜氏妹由豐署歸家殉於舟次

話雨還榮共榻情

遲舍弟覲

棧馬

頻年空戀豆萁鱸何日得嘗羹鱗鴻盼斷親朋信只聽

風中草木聲

鳳凰臺走兔狐羣明月揚州亦毒霧

金陵揚郡均先失陷

勝地都

遭新劫運偏隅敢恃故將軍

用劉漫塘秦香觀記語

哀江南怕重

吟賦弔戰場愁再讀文安得休兵如昔樣吾廬歸去託

耕耘

練湖訪權文公故宅

蔣圻

秋來攬勝最相宜權里村孤占水涯漿藿願消身外累

煙蘿空賸夢中詩白鷗歡喜如迎客黃葉蕭疏自繞籬

偶向西風寄憑弔山光湖影不勝悲

輓張總統國樑四首

并序

李聯琇

公字殿臣粵西人咸豐初年拔身羣盜投向提  
 軍榮營遇以國士及提軍經略江南公以偏裨  
 勦匪山東累功擢副將旋調赴江南百戰堂堂  
 績不勝紀六年向經略病篤大營被衝退至丹  
 陽公力過狂燄保障吳越轉危為安經略薨代  
 者提軍和春公時游階松江提督幫辦和營總  
 統江南諸軍旋克復揚鎮諸郡縣和經略忌公  
 名出己上公屈禮下之然終不聽公計當皖寇  
 寢變之時公欲先盪皖南而和經略令其專扼  
 江北殫竭全力始復九秋洲片壤遂剗長濠斷  
 金陵賊路雖降旗幾出石頭而皖寇入犯蘇浙  
 牽掣我兵卒有十年閏三月秣陵關之潰公裹  
 創轉戰至丹陽相傳陣亡於十里牌而公麾下  
 將士之守京口者佯言公尚存將以死亮走生  
 懿也賊聞之疑慮八月間賊眾二十萬攻圍鎮  
 江城城中兵少垂潰越夕賊或反奔出迭大敗

重刊丹陽縣志  
卷之三十四  
之圍遂解詢之俘虜具言圍合時猝見總統張  
字旗無數蔽空而來故遁噫睢陽為厲鬼以殺  
賊豈虛語哉頃閱邸抄未見公卹典殆猶不得  
其實抑諱其死也悲哉公平百城莫抵百身莫  
贖詩以  
告哀

夙生周處定無疑蛇虎同心化老羆閭左拜官歸命倡

江南無福受降遲威弧總向天狼射絕鞞偏教扇馬騎

公馬與人一心至丹陽斃王翼長浚贈公馬公試騎奔  
逸墮橋下創甚乃知其為扇馬也翼長嘗譖公於和者  
蓋蓄禍心矣淚灑前功曾幾死萬人衽席一身危

賈復終然忌寇恂進明又不援張巡中軍倡走先空邨

鄰境同仇莫望秦旨酒一盛羣鼓譟長矛十盪獨悲辛

若非事裂諸公手名將何愁敗兩甄

投壺亦復解詩歌孰謂將軍快快多長把知音哭宗澤

可憐為國下廉頗遺黎盡唱丁都護戰士今誰曳落河

猶具靈旗颯風雨鬼雄殺賊相天戈

遮蔽東南財賦區金甌大局繫三吳正愁獨木支全厦

況駭中流失一壺馬革裹屍情慷慨虎賁送葬認模糊

從今玉乳泉休飲萬斛悲音咽練湖

七絕

玉乳泉壁間詩

無名氏

騎馬出門三月暮楊花無奈雪漫天客情最苦夜難度

宿處先尋無杜鵑

丹陽送韋參軍

唐韓翃

丹陽郭裏送行舟一別心知兩地秋日晚江南望江北  
寒鴉飛盡水悠悠

湖上鴛鴦

許渾

西風澹澹水悠悠雪照絲飄帶雨愁何事歸心倚前閣  
綠蒲紅蓼練塘秋

送友人歸丹陽

王建

江城柳色海門煙欲到茅山始下船知道君家當瀑布  
菖蒲潭在草堂前

延陵破培

在縣南二十五里即管鮑分金處

李仲舒

管鮑分金舊所傳破培今見想前賢義風掃地天還日  
一觀令人一泣然

詠丹陽玉乳泉

張翥

巖松偃蓋不知年寂寂秋燈寶供前清澈一泓傳萬古  
空山長伴白衣仙

呂城屏陵侯廟

宋劉宰

呂公遺壘枕高岡落日西風草木荒王氣懸知南國在  
不妨北面儼冠裳

詠沈山寺桂

楊萬里

夢騎白鳳上青空經過銀河入月中身在廣寒香世界



覺來簾外木樨風

丹陽泉

林景熙

揚子江中斟夜月  
慧山亭上漱朝煙  
遙看丹氣霏微裡  
二十泉中第四泉

草堂自題

陳輔

湖水如雲繞郭斜  
茂林修竹野人家  
宿醒過午無人問  
臥聽東風掃落花

九里沸井

泉在季子祠東南百餘步古井數十如鼎沸焉

歐陽至

延陵一帶湛溪流  
九里靈泉沸不休  
天為嘉賢表清節  
長教活水出源頭

普甯寺

元薩都刺

燈火僧房任寂寥  
小涼天氣入青袍  
夜深獨倚西廊柱  
藥杵一聲山月高

經山寺寓宿

薩都刺

晉人種杏已千尺  
幾見山中僧白頭  
老幹清陰蟠雨露  
長廊六月似深秋

題陳少陽公祠牡丹亭

蔡沂

生同國色原無主  
血瘞江南始有家  
千古忠魂消不得  
東風開作故園花

過張祐故宅

明周紀

夜雨裁詩向草堂春風石笋滿林香而今寥落橫塘路  
那有新詞解斷腸

延陵孔碑

墓

碑在邑西南季子廟中相傳孔子以馬鞭書之其文曰於乎有吳延陵君子之

潘之彪

千載高風說有吳荒祠古蹟見芳模郊原葬盡英雄骨  
問有尼山片字無

潛龍遺脫

下御容藏寺中衣織

相傳建文讓皇帝得度牒從地道出都至丹陽碧霞宮薙髮瘞於廟後石浮圖

潘之彪

血戰元黃卻不前碧霞宮裏且逃禪夜深風雨石函髮  
猶作龍髯飛上天

白鶴瓜畦

其父有白鶴起於壙中

白鶴山在邑西三十里孫仲謀之祖種瓜於是瓜熟先祀山神祖為之擇地葬

白鶴山雲面面遮青門只傍老農家孫吳霸氣消沈盡  
猶有村人學種瓜

丞相孤墳

餘草冬夏不彫

陸丞相墓在邑東南五十里相傳宋陸君實殉節南海子孫招魂葬之墓高丈

說到崖山聲已吞欲招難返海濱魂一坏猶借雲陽土  
掩得朝衣半淚痕

經山晉杏

諸葛筠

一樹離奇絕後聯人傳一馬化龍年秋來黃葉堆階砌

老衲袈裟亦上眠

九女高墩

諸葛筠

辰溪墩下是仙家時有雙鬟出浣沙波濶雲深迷去路  
洞門深鎖碧桃花

春日過普甯寺

姜兆錫

誰憐晉代舊衣冠古寺春秋舊雨寒回首堂前昔時燕  
雕梁孤向佛燈看

蔡肇宅

在縣東五  
十里竹塘

姜兆錫

湖畔山人一卷詩王家駙馬數金卮誰憐堂上蕭蕭竹  
猶似西園月落時

尋權德輿故里

賀

閒步湖邊夕照斜偶從野老問蒹葭冷煙衰柳淒風處  
指點當時宰相家

弔家孝子璧如

姜克三

不憚焚身真孝子身燬棺全拚一死只知事死如事生  
垂死猶呼兒在此

練湖消夏詞

趙元益

湖光如練輒生波亭坐湖心暑不多正是月明茶又熟  
隔湖聽唱採菱歌

納涼最好練湖心消夏偏宜練湖曲流螢數點衣上飛

飛入湖陰自然綠

小辛鑿道

林植本

太平御覽引吳志云岑昏鑿丹徒至雲陽而杜野小辛之間皆斬絕陸贄施力艱辛自註云杜野屬丹徒小辛屬曲阿今吳志無此文當時殆別有所據如吳書吳錄之類耳縣志秦鑿道下引唐圖經云秦有鑿道又輿地志云吳孫皓鑿道於杜野即厭王氣之所漏載小辛且未知杜野本屬丹徒也

小辛咫尺望齊陵百代山河閱廢興誰使孫吳踵秦弊空餘鑿道勢崢嶸

練湖竹枝詞

周玉瓚

丹陽城外後湖連風景猶懷典午年受得春流七十二

分明匹練遠襟天

湖上修眉帶遠山湖邊迤邐白蘋灣斜陽影裏漁歌起撒得銀鱗載網還

太祝幽居對浪花權文公宅柳陰斜詩人都愛湖濱好茅舍三椽便作家

上湖水與下湖通淡淡輕波細細風空外忽明千點雪鷺鷥飛入暮煙中

僧居種得芰荷香竹徑陰多水氣涼爲覓輕舟來避暑湖心亭子在中央

湖裏山神潑酒時曲阿酒好古來知春郊一路東風暖



試向湖頭問酒旗

竹弓射鴨有生趣草屨撈蝦無定蹤冬盡沿湖清淺處  
長竿又見取菱葑

玉女郎官漫似妝漑田誰似此湖忙西南千頃秋秧綠  
亢旱雖逢也不妨

漕運經冬水易乾臨河啓閘運途寬湖功獨上河渠志  
元史編中子細看

二十年來事不常一湖興廢閱滄桑前黎後趙兩太守  
自有鄉人說短長

曲阿雜詠

周玉瓚

延陵讓德著人寰十字穹碑古廟間多少公卿誇不朽  
何人題墓得尼山

地接金陵萬樹春秦皇馳道未全淪赭衣厭勝終何益  
豐沛山中別有人

萬峯迴抱子城青大帝英聲尙可聽射虎人歸風力滿  
斜陽有客問慶亭

皇甫齊名更二何中唐詩客雅音多東歸自得張承吉  
又有清吟滿曲阿

呂城雜詠

黃之晉

霸業浮雲過太空虎龍餘氣歇江東更無一寸孫郎土

底事城猶屬阿蒙

射虎凌亭意氣驕英雄事業付煙消至今虎落村前路

流水斜陽有斷橋

鎮南有虎落村志作虎臘

在昔魚盤曾刻木

古風宴客有設木魚代烹鮮者今不復見矣

而今象箸更

鑲銀好奢最是閨裝變要學蘇杭色色新

倭寇能當勇素名時清俗久不知兵兒童枉襲從前諺

銅作奔牛鐵呂城

小麥青青大麥黃豆花短短稻花長夏畦辛苦官知否

每饋珍珠粒粒香

地產香稻名香珠米官廚饋遺用之

入官藥草聞墩香

墩產青蒿等藥官署收之

入市魚蝦開口良風味

最憐時裏白秋風未起早思鄉

閩下產白魚長尺許五六月出俗呼時裏白

蕭塘

陵口東有渠北達皇業寺相傳武帝薨疏鑿以進殯者

景昌榱

一灣清漲碧於苔喬木陰陰傍水隈六代興亡渾不管

橫吹短笛過橋來

建陵碑

建陵在陵口北華表刻太祖文皇帝之神道係反正書

景昌榱

華表頽危臥夕陽墓門終古閱星霜何人反正尋碑篆

翁仲無言泣路旁

辭

懷延陵季子辭

有序

明 楊維禎

延州季札吾聖人子其禮又表其墓太史遷發其仁心慕義無窮其知札矣近代傳經者獨以爲聖人貶札咎札不爲季歷而效子臧以致辭國生亂吁是說也顧計利害而不計義之所在尙爲知春秋者哉札自以諸樊爲義適而不敢奸國則知札與州吁皆庶也壽夢欲越三長適而立一季庶所謂亂嗣不祥者也而況三伯仲俱無泰伯仲雍之奔季子棄室而耕者正也及夷昧卒而欲致位於札札之見微固已逆料光僚之必悖於其後故剛執始終之志又札之明也季子之道正而明而謂聖人貶之乎春秋書名固有美例而憑以爲善惡之斷求經之陋者也三傳有因札進吳之說其名札者成尊於上也謂名爲貶得乎余作懷延陵辭因復著辨使談經者不失聖人之旨則

惟句吳之開國兮實周先之長宗日端委以自律兮聿荆彝之來從嗟後之人弗率兮將自同於啓戎去諸姬

以日遠兮十有四葉而稱王夫何乘之逆德兮又鍾之以順嗣既博物而閱覽兮仍約中而通理識周之所以東兮基之所以南聖之所以憾兮德之所以慚類比學於周公孔子兮羌不讓夫東郊過齊晉之大邦兮警貪功與好直魯宗卿之岌岌兮憂好善而不擇辨鐘聲於戚邸兮危夫人之燕巢受衣紵於僑之贈兮蓋驩然若神交故授於非其所受兮律干鈞於一髮苟奸國於不義兮甯子臧之附節巢既殞於諸樊兮聞薦乎戴吳天將啟乎季子兮抑翦喪其夷孤悲上國之使歸兮賴先祀之猶有在也亂之生則有由兮進鱗諸而退以待也

鳴夷載於江中兮游鹿上乎荒宮問七王以何在兮歌  
至德之遺風遵閭門以不于兮感特書之題窆也矢吾  
辭以白心兮比徐君之懸劍也

丹陽姜孝子哀辭

有序

湯金釗

余讀姜孝子行略而哀其志之苦也其父臨歿  
遺命其三子讀書不成名無葬我夫名之得不  
得有命存焉設竟不得將終身不葬其父平日  
月有時久淹親柩人子將何以爲情迨兩兄相  
繼游庠議葬事其母又執遺命以阻嗟乎獨不  
聞無違之義在葬之以禮乎婦人暗於義讀書  
明理之子復不克救正致有救柩焚身之慘豈  
不大可悲哉徒觀其哀號躍入日甯灰我骨無  
傷父柩匍匐烈燄中連呼兒在此卒之身燬而  
棺完非孝心感神何以能此非至性過人孰克  
爲此余故哀其事而弔之

嗟我生之不辰兮不逮親而成名累彌留之諄諄兮謂  
余窳窳其弗營豈不知入土之爲安兮神悠悠其永甯  
云究命其莫從兮又惡違母教於生平賜一日而九迴  
兮策日月以邁征嗟祝融之降災兮酷突遭此奇禍風  
發發其冬夜兮勢烈烈兮樓之火眾欲拯而莫敢邇兮  
塊獨躍而直果聽哀籲之徹天兮願保親而燔我桀桷  
燼於須臾兮詎茲木之獨可信昊天之孔昭兮竟身灰  
而柩完匪至性之上格兮奚爲呵護於茲棺惜不反風  
兮俾孝子之兼安幸而柩全兮尙孝心之克寬綜始終  
而揚挖兮爲援翰而心酸



賦

練湖賦

有序

國朝

賀鑒

距郭西百餘步得大浸曰練湖舊傳為開氏址一名開湖蓋納長山入十四流而潴之其所產歲輒更也湖於陽既溥厥澤而通漕灌河功且甲三郡中郎之所贊揚光祿之所吟詠一奧區矣唐人李華有湖頌見府志詞義樸澁不足觀余旁蒐典故約平本旨迺作斯賦

爍哉鴻似桐柏協精九水既濬支澤區呈窺逸典而窮妙維茲湖之憑靈原夫開公拓跡陽侯尋盟餐苓鮫室揮絃鯨城濯丹腑而覩逝神相羊以波征跨羽而適青冥者靡得而衡焉爾其為大也灑灑灑灑滉滉滉滉澆澆澆澆洩盆漏肩湘昆泗涵阡輔邑平穹汨地石城戴冠鐵甕

緣珥環麓奔注八十有四懸武勺其上流涪蕩渺乎下侍廓原隰以若浮隱星辰其倒位晉敏藉以蓄儲宋道櫻而眾忌彙茂譎之祕淵遂彌漫乎繁利其東北則平林蓊鬱紺刹籠從礮疊視碧眩朱封鳩巢篆亞鶴徑苔蒙海童昵象神娃騎龍睇波光之及夕聆鼉音之逢逢其南則崇峯巖辟綿綿延延檀欒列幕榭檇杉挺蔚乎櫛茂比櫛聯錢仙人之府設真隸懸濡瀲灩而衍布翁岡首兮欲咽若迺青陽屈令雲物浸嬌眠莎接蘊離蔣蓀蕪攢苞發蕾馥郁飄搖鳥則鷓鴣鷺鷥鸚鵡鷺鶻瀉瀉瀉瀉澁澁澁澁啞啞澁澁迴翔乎蒼葭之濱棲遲乎仙邱之

陸爰有修稷之朋金谷之客搜宓妃之墜瓊拾彝光之  
翠飾擷芳茵兮贈歡迴清箏兮若泣玉山頽兮朱顏酡  
淥水發兮雁柱歇眇望舒以爲期雖秉燭而遑恤及夫  
蕤賓之辰蓮葍散豔方舟倩媛游於西灣承波容裔凝  
髻拭顏垂膩腕而舒粲擾敗紅之壓鬢擢香國於遙夜  
耽澁灑之靜憫濺纖阿之麗相盥絳妝而狎鸚若迺蓐  
收受權鶉尾懸象眇睇虺塏颺颺桴盪慙觴戩汨蒼壤  
沈陽琴高望瀾而躑躅耕父憩漚而慄快渚迂穴以溯  
泚睇濱淪其觸蟒訝怒濤之瀾淫詎濟淮之有雨又若  
形霾掩嶂霏雪驕空鎚冰礪雹鑄珠磨瓊聲黃竹之悲

唱迷剡溪之孤舸文鯨奮鬣而失道精衛運石而蒙瞳  
浙凍密於枯響滯寒飂於隻鴻攬天水之一素洵目極  
而意忡其誌產也珍蒔煜熠不名一端爰有璐瑋碑磔  
塗球璣珊金華銀樸紫貝鐐丹隋侯絨櫝太顛薦盤下  
則葑蒿黛堊棲泐埋湍干羣荷鍤其耦齊謹蒸藜執爨  
薰颺禦寒比儷乎瀛池之囿彷彿乎驪鱗之磻斯神區  
之奧域信睽瞍而屢觀於是高郡逸士乘流逍遙廬築  
小而環石席依渚而縈颺承沆瀣於潛慕攀萍實之盈  
瓢悟漣漪以挾藻鑿停汧而進怱弄明月兮川之澗溯  
澄波兮游文撓俯而視之若涉海之躡於漚也渺渺乎

風颯乎疑適瀛滃御而霽乎其搖爾迺徵虞人逐罟師  
張罽繳設罾笥筍灑芒鉅艤艫碁置詹何遜愚任季匿  
智虛往實歸澀嘉聚肆則有鯛鯢鯢鯢鯢鯢鯢鯢鯢鯢  
鯢費鯀蠙肥鮮鸞刀在握霍霍嬛嬛滋以芍藥之和滌  
以蘭英之煎竝天府之至饌非羶薌之所存焉礎函碣  
峙此焉雲閔疆脞繡錯阡陌鱗程條風舉趾膏腴中盈  
堅苞穎栗麟韞垂莖奄觀銓人千倉萬竽戶擬八蠶之  
富家登再熟之陳於是朋酒滌場苾芬斯應句龍旣虔  
田祖爰竝祭黍獻羔鳴琴清磬有壬有林百禮孔訂介  
福穰穰曾孫是慶若乃四達之都商僧駢集狼狽夜齧

夫南晝易曳縞履紉金雕珂勒迴艫飛檣賄衍鉅億其  
於囊也桃笙象簟蕉葛升越玻璃龍腦犀渠湛盧之屬  
鎡琲闌干縱橫充塞咸乘橈而望洋詣茲濱其待誠詎  
允濟乎稠賄詠周詩之雨公輸河伯而爲助非巨澤之  
徒雄於時漕輓鼠接早威凝臙連艫遞舳最屢旋洪長  
年之屬虎賁之羣鷹瞻羹沸層還千百而騰乎黃幪於  
是鄭白之注決渠揚鋏滂沱雲集資艫灌橈瞠乎其始  
也鍤錐逕律帶篙咸會聊迎波以容與漸奔河而波霈  
導眾派之溯洋率鴻翻而龍蛻爾迺鳴舷並進懽聲若  
誼神功待運曾不濬川千里効職饗帝屬解甸衛詔祿

重刊丹陽縣志 卷之三十四 五  
偏裨授館黜九府之織計歌三時之有年胥養廉而寶  
稼疇庚癸之足傳司農於是披雲緇蒐水牘覽邑都拯  
陽族寬星科蠲逋稂人民豐四序淑孰與夫東臯之麗  
濱南陽之私澳遂系以頌曰靈祕覃毓鍾斯泓兮崿澤  
四至望盈盈兮洄容愛濩奉芳蘅兮桂父澹魄赤須醒  
兮瑰譎充溢匪專名兮黍與稷翼膏無屯兮灌瀆殫魃  
瘳河憚兮干檣若駟輸於京兮拊瑟陳榮羞曦瓊兮月  
畢應液康吾氓兮

練湖賦

彭澧

客有言於彭子者曰粵自三五氤氳高卑奠位山挺秀  
以常尊水汪虛而深闊恒華泰岱遙摩雲笈之奇淮海  
江河驚探星源之異固臚列於新編亦流傳於昔記則  
有五行之始滙而爲澤九水之濬區而爲湖餘杭擅聲  
於靈苑宮亭紀勝於荆吳莘老之珠光燭天留豔稱於  
蟹社太白之載酒乘月溯懿蹟於當塗繫八紘之靚軌  
據四表之雄都若陽之曰練湖者廣不週乎百里深不  
踰乎一尋陂不足以集廣陵之矢濱不足以投任李之  
綸胡乃圖之於古著之於今雜諸名流之乘載而不絕  
乎學士之謳吟彭子曰噫子來前拘儒縈耳而賤目達  
士校實以徵名謂天台女儿而外必無偉麗之區傖也

重刊長陽縣志 卷之三四  
謂鵬冥鯁壑而外必無環瑰之府醒也且夫辨物居方  
依乎其本義正事實核乎其程此孟堅之所以名重兩  
都而太沖之所以思慕二京也吾子尠於見闕於聞吾  
爲子言其勝而子其試聆之是湖也牛分鍾英鶴溪裂  
秀開氏拓基相羊穴菁鐵甕儲精石城緣脰扶桐柏而  
分流櫻元武而合湊綴浩蕩之淵潏攬曲阿之裾袖其  
爲狀也洪波浴日巨浸橫煙汨平穹之瀼潏走修壑而  
洄漩蓋奔注乎長山之流八十有四而爲之滄泓灤灑  
乎其間爾其彙諸流之森瀚沂星辰而載浮蕩蒼穹之  
無壁澗白練於芳洲匪空濛之曙色紛百族而中游疑

問源於渤溟儼雲漢以乘舟其南則層雲霧列綺陌星  
馳復樓閣而翔舞偃雉堞而參差秘窖經於謔母掘金  
鶯而吐池簇仙霞之舊嶺孕玉乳以瀰澌其東則沈經  
嘉風鬱乎葱葱遠岵嶸嶸危岬飛沖滲赭山之壁立植  
寶誌之遺蹤亘蜿蜒而疊積倒寰影於清澗其西則白  
楊故跡辰溪舊趾孫鍾灌瓜之畦白鶴飛仙之壘紆萬  
頃之茫洋宛盈盈於一水其北則曲輦長岡文季功恢  
廝秦墟莽二壘空頽憶賈傅之馳驛睇復道之縈迴緬  
前賢之修躅餘千里之荒隈其中則斗門參立修塹如  
虹丹林翳蕤黛宇龍從小橋蘚剝斷石苔封恍天台之

踣欲絕而桃源之渡可通於焉沿曲徑入芳塘撫嘉木  
厯新篁隱雲房其合翠叢金條以縈黃注滄波其無極  
橫野渡之歸航豈避秦之遺佐乃溯回乎中央則有亭  
臺插溼梵宇聯翩回廊卷曲峻閣危懸風櫺櫺次月殿  
芊眠繞湖光而一色樹玉鏡於長天其木則櫻杉桐柳  
桑梓槐橙鬱翳蔓蕝黝蘘葱青虬蟠輪囷瀏沆雲駢其  
草則青芝土菌藹綬葉菱萇芡芷蘄范胡繩薜蘿莎  
蘊茁蔣苞荳錦繁繡縟狎獵糝英其花則蕙蘭芍藥揭  
車辛夷杜鵑木槿茉莉薔薇砌鞞鞞之麗藻糾轆轤而  
旖旎其竹則篔簹篠簜篴篥簞簾筵篔箭紫籜蒼琅

其石則青州貢怪靈壁輦碯沆沙醒酒雲錦支機紛溶  
瑑璠礪砢碗碗其鳥則黑鳩白鷺鴉鵲鷓鴣鷓鴣鷓鴣  
鷓鴣鳧鶩遠波雁踏空澤鶯啼恣翱翔於淳潏咽瀕洞  
於清溪至若稽之水簿厥族惟妍則有鯪鯢鮠鯢鯢鯢  
鱸鱖鯉鯢鯢鯢鯢鯢鯢鯢鯢鯢鯢鯢鯢鯢鯢鯢鯢鯢鯢鯢  
詹何駕媪張罩藿設尻筌結輕舸而若驟迎潮水以  
振緡猶射鮒於井谷聿容與而蹠蹠聆呶嚶之晚唱接  
惠笛於清漣乃若象以候遷景因時變當夫勾芒御歲  
元鳥司辰鶯棲密蔭燕蹴湘潏灼桃紅於夾竹滴菰綠  
於湖濬裊遊絲於木末舞狂絮於香塵憶王孫於芳草

重刊丹陽縣志 卷之三十四 三  
舒里婦之輕顰宜其春也少皞秉政青女宣猷蓼花風  
起木葉霜收吏部之螯已老刺史之鱸堪羞披堤蓉之  
吐豔挹渚桂而香浮映金波之素月攀星斗於江樓宜  
其秋也時窮元律月建應鐘檜黃楓赤橘綠橙紅翦落  
波而更永卷蒼雲其暮同暄風霾而暗麓屑玉宇而霏  
空聯斷橋而生白錠梅蕊於幽叢宜其冬也至若芰荷  
盈川尤宜者夏當夫火正司權日躔畢舍晴日一簾清  
陰滿射擬濯纓於滄浪收偉觀於亭榭則有綠葉朱華  
並蒂揚娟垂青房而屬蓋結翠沿而連錢耀蘭皋而振  
彩引蒼泚以呈鮮掩婀娜於月下綽窈窕於風前於是

綴幽清之概歌古人之章有曰製綠芰兮爲衣把瓊枝  
兮餐玉蕤心中樂兮樂忘歸則見夫遊侶繽紛詞人雜  
還士女攬裾輿馬轂擊亂渚次而鋪茵鑿沈流而接席  
逍遙曲澗之濱笑粲芳華之日躡垂楊以問前津藉蒙  
茸而承綺陌儼人世之在玉壺滌塵寰兮於水谷亦有  
慕古之英感時之哲覽巨川之浩茫思昔人之往蹟晉  
敏藉以蓄儲宋道櫻而厭嫉訪權相之里居渺一方其  
何及至若境開氣爽物幽象澄佩蕙瀨之芬馥採蘭沅  
之絲蓴度閒雲之舒卷積潭影之空明斯豈不足以動  
中郎之狂賞而矢光祿之清音耶且茲湖之所稱獨絕

者又非徒以其山水之佳花柳之勝景物之妍時序之美已也蓋聞之古云湖水寸潮水尺茲湖蒞陽通漕利涉輸輟灌畦東阡沃陌陽侯之靈實溥厥澤當夫漕輓東下逾淮涉江連艘遞舳挽舶凝艤移艚走艦檣舳奔艫則有虎賁之士鷹揚之屬豎朱標插高燾戴箕劍衣單襦扣危舳夾巨舳震邪許而成雷鼓謹聲於渠澳映旌旗而蔽空累駢肩而追躅若夫財由賈集賄以商通則有兩蜀之俊三吳之雄擁輓轡之長劔曳紉縞而璫瑤齋巨鏹以競發壓卓鄭於臨邛其珍則琨瑤銅錯素玉頰丹明璣紫貝縹璧球珊精焜煜而潛穎光燭耀其

闕于複歲襄而潤黜集宇內之恢觀其物則有安陵之棗真定之梨桃笙象簞楚葛名綈綜磊珂而排沓溢縱萃而惟綺囊紛紜之異質以待誠於茲湄爾其檣舸混異漫衍喧阗躑塵羹沸紉纜殿迷長年三老振鐻鳴輦挾淤泥而滂沛轉積運而如題匪脈交而血貫曷羣會夫輕桅乃若控蠡堞之繡瞭襟鷺汀之腴畝擅東南之奧區別中林之蒿蒨當其始也杏花毓樹蒲葉抽叢溝塍則縷蓑笠蒙戎耒耜輻湊丁壯就功水鄭白而分溜人沮溺而其同爰是田畯至春士媚婦依揮鋤去萸荷插抽犁盭裙羹於野徑餉魚飯於斜溪服先疇之稼穡



築修堰而洗隄暨夫南山之豆已熟北地之禾既升櫛  
苞粟而垂穎奄銍乂以齊登倬原隰而底績駕車箱而  
懽騰霜場已滌羔酒盈鴟戶欣再稔百靈是資歲豐而  
民知禮讓家足而國贊雍熙斯更不足以扇薰風於舜  
日祝公雨於周詩也耶彼夫五嶺三華三湘七澤遁迹  
荒繳潛光絕域縱陟遠其孤征俟襄糧而累月若乃隋  
堤衰柳越沼殘荷弔包山之蕩往步響屨之宣娥酌西  
陵之蘇小襲衣香於苧羅無春朝與秋暮豔媒褻其婆  
娑徒使妖童冶女擷笛鼓簧蒸梁金鼎燃燭銀缸歌衫  
舞袖雪遏霓揚耕耘失職孰利桑麻何與夫靈秘覃育

灌瀆縈穰念山樞與蟋蟀阜生民於練塘於是客聞之  
悚然避席曰鄙人固陋罔識上都之勝幸聆明教意下  
心赧然矣

玉乳泉賦

賀履謙

伊大江之東逝兮沛勝景於扶輿維萬派之流貫兮滙  
清澁於潛渠標名泉於九宇兮考中泠於唐初彼錫山  
之雙穴兮飄素雪而容與若乃雲陽劇邑廣福榮名利  
基兩晉額啓承明聽澄潭之瀟灑驚巨筆之繽紛古幹  
槎枒而交樾清音迅激而成文則有名流達伯攜鑪蠟  
屐挹彼注茲餐霞瀝液靡靡似玉奴脫乳爛爛如夜光

遺璧盤露之甘肥則然羊脂之潔蠲逾白涼飈起兮奏  
洞簫秋月下兮影漂搖吐瓊英之仙沫濯龍女之輕綃  
窈然深靚品則森標蓋其得之也既干有奇齡其顏之  
也又七百餘歲與荆公之三峽同清調雀舌之芬芳若  
蕙陋巷之簞瓢久已稱顏柳下之遺民何妨作惠嗟乎  
斯泉也使其居鄂杜之間吳會之次遊人士女笙歌妙  
麗貯海月而流馨酌天香而共醉斯古今之佳談抑三  
吳之勝事奈何玉漿隱而知味猶希茸闌高而英賢反  
置亂日山高高兮寒慄慄閱有恤兮靈所寢光團團兮  
駐琉璃煙霏霏兮蓋冰錦甘如飴兮滑且柔羹無度兮  
清可枕名賢嗜兮第四品收勿幕兮千日飲

